

17. oktober

UKA 2017/132

Avatangiisit innarlitsaaliorneqarnissaannik Inatsisartut Inatsisaat nr. 9, 22. november 2011-meersumi kapitali 6-imi, imeqarfiit killeqarfiini suliassaqartoqartillugu immikkut akuersisuteqartarnermut tunngatillugu, aalajangersimasumik erseqqinnerusumillu maleruagas-siunneqarnissaanut Naalakkersuisut kingusinnerpaamik UKA18-imut siunnersuummik suliaqaqqullugit Naalakkersuisut peqquneqarnissaannik Inatsisartut aalajangiiffigisassat-tut siunnersuut.

(Inatsisartunut ilaasortaq Villy Olsvig, Inuit Ataqtigiit)

Inatsisartunut ilaasortap Villy Olsvigip inatsisartunut aalajangiiffigisassatut siunnersuutaanut Siumumiit imaattumik oqaaseqaateqassaagut:

Siumup pingaartilluinnarpaa imeq minguitsoq innuttaasunit tamanit atorneqarsinnaajuarnissaa. Pingaartumillu imeq imerneqartussa, imalt. inuussutissarsiornermi imeq atorneqartoq minguit-suutinneqartuartaqartoq Siumumiit isumaqarpugut.

Tamanna qulakkeersimaneqartuartaqarmat naqissusissavarput, aammalu pingaartumik inuup peqqissusaanut innarliisinaasut akuutissat annikinnerpaaffissaaniitinneqarnissaat Siumumi suliniutiguaratsigu. Imermi imerneqartoq tasineersuukkajummat nunatsinni apilluartartumi ilaatigut qamuterallannit ingerlaarfigineqangaatsialersarput tasit imeqarfigisavut. Tamanna ulorianaateqartoq ilisimaneqarpoq tassami pujoq, oliamik ingerlateqartunit aniasoq, apummut imermulluunniit akulerukkaangat kaanngartikkuminaatsuunera aammalu malugiuminaat-suunera ilisimaneqarmat.

Savimminissaq oqimaatsoq imermut akuleruttoq, erngup imernerani timimut unittarpoq, tamannalu peqqissutsimut annertuumik innarliisinaasooq uppersarsarneqareersimavoq. Taamaattumik inuia-qatigiisugut ilisimasariaqarparput imeqarfiit eriagisassaammata aammalu sapinngisaq tamaat mingutsinnaveersaarluinnartariaqarmata.

Siunnersuuteqartup ujartorpaa maleruagassiortoqassasoq. Imeqarfiit killeqarfiisa Inatsisartut inatsisaannik illersugaanerat Siumumiit tamanna pillugu illersueqataagatta oqaatigisavarput. Tamanna aamma Naalakkersuisut oqaaseqaatiminni ersarissumik oqaatigaat.

Siumumiit maluginiarparput Naalakkersuisut oqaatigimmassuk immikkut akuersissutinik agguaa-sarnissaq erngup mingutsinneqannginnissaannik qulakkeerinninnerpaajussasoq. Sumiiffimmiit sumiiffimmut assigiinngitsunik atugassarititaqarnerata immikkut nalilersuinissaq pisariaqalersip-paa.

Taama Siumumiit oqaaseqarluta Inatsisartunut ilaasortap Villy Olsvig, Inuit Ataqtigiit siunnersuutaa itigartipparput.

Ineqi Kielsen
Siumut